

مات الولد

مات الولد والكل هلل قال شهيد
مات الولد مع ان أمه دعيتله بالعمر المديد
مات الولد وسابها هتعيش ميتة
دم الولد كان العيدية لأقسي عيد

.....

كانت تصلى الفجر تدعيه بسعادة
وتقول يارب احميه يكون عمره بزيادة
كانت بتتمناه تبوسه وتحضنه
والعيد يكون فرحة .. وفرح العيد عبادة

.....

رن الموبايل قلبها رفر ف عليه
ابنى حبيبي بيتصل ... ربي يراضيه
وعيديته هتبقى صوت اللى اسمعه
يكفينى اسمع صوته واطمن عليه

.....

طلع اللى عالتليفون غريب وما تعرفوش

وجاي يصبرها قالتله بصرخة لا .. ما هصدقوش
اندهلى ابنى ضنايا وهعيد عليه
اوعاك تقولى انى عيني هتتحرم وما هتشفوش

.....
كنتوا فين وابنى بيتكاتروا عليه
ابنى راجل مات مع سلاحه فى ايديه
لا ابنى عايش جوة قلبى
بين ضلوعى مد ايده لقلبي وبطبطب عليه

.....
عمرى ما اغضب ربي ما ارضاش بالنصيب
بس قولى ان ابنى عايش واللى مات واحد غريب
قوله امك عاوزة تسمع صوتك اصحى يا واد وفوق
عمره ما يزعلنى ولا يعصانى .. نور عيني الحبيب

.....
ابنى فين ... قلى فين الطلقة صابت
وابنى امتى وفين وليه ... شمسه غابت
ابنى عاش كام دقيقة يتوجع ؟؟؟؟
ابن قلبي ذنبه ايه اهته طارحة ف قلبي فدان مالاها
ويادوبه نابت

قُلتوا مات طب أمين
هم فين هم مين ؟
ربنا يحرق قلوبهم ... زي حرقه قلبي انا
يتكوا بنارى سنين تطرح أنين

.....
قُلتوا مات طب وماله
كنت بحلم اشيل عياله
ابنى جالك راضيه عنه
ارزقه الجنة يا رب وحليها له

.....
واللى صابه حسابه عندك
سايبهولك راضيه حكمك
ابنى يا ما غيروا سبقوا
حقهم محفوظ بعدلك

.....
بس قلبي ناره قايدة يارب سامح ضعف أم
نار بتكوى بين ضلوعها .. والدموع مالمقلب ... دم
راضية وابنى يارب ما هيغلاش عليك
نفسى أصحى يكون كابوس ما يكونش علم .